



NEYTENDASTOFA

Ákvörðun nr. 46/2023

Ákvörðun um sektir vegna ófullnægjandi verðmerkinga Fjall Raven

I. Málsmeðferð

Dagana 28. ágúst til 15. september 2023 framkvæmdi Neytendastofa skoðun á ástandi verðmerkinga í ýmsum verslunum á Laugavegi og aðliggjandi götum. Kom starfsmaður Neytendastofu þ.á.m. í verslanirnar Fjall Raven á Laugavegi og Mt. Hekla á Skólavörðustíg, sem eru reknar af Mt. Hekla ehf. Í skoðuninni voru verðmerkingar kannaðar með tilliti til ákvæða 17. gr. laga nr. 57/2005, um eftirlit með viðskiptaháttum og markaðssetningu, sem kveður á um það að fyrirtækjum sem selja vörur eða þjónustu beri að verðmerkja vöru sína og þjónustu og sýna það á áberandi hátt á sölustaðnum, sem og ákvæða reglna nr. 536/2011, um verðmerkingar og einingarverð við sölu á vörum. Samkvæmt reglunum ber fyrirtækjum að verðmerkja vöru með réttu söluverði þar sem hún er höfð til sýnis neytendum. Skoðanir starfsmanns Neytendastofu leiddu í ljós að ástand verðmerkingar inni í verslununum var ábótavant og útstillingar beggja verslana voru óverðmerktar. Í Fjall Raven voru gerðar sérstakar athugasemdir við óverðmerktar vörur inni í versluninni m.a. Grímsey vesti, Logo badge sweater, derhúfur, vatnsbrúsar o.fl. Auk þess voru engar sjáanlegar verðmerkingar á gínum og vörum í glugga verslunarinnar. Í versluninni Mt. Hekla voru gerðar sérstakar athugasemdir við óverðmerktar vörur inni í versluninni m.a. vasahníf, vax og sprey við kassa. Auk fyrrnefnds voru engar áberandi verðmerkingar á útstillingum verslunarinnar.

Starfsmenn verslananna kvittuðu fyrir komu starfsmanns Neytendastofu og þeim athugasemendum sem gerðar voru við ástand verðmerkinga. Í lok skoðananna skildi starfsmaður Neytendastofu eftir bréf í verslununum þess efnis að skoðun hefði farið fram og að Neytendastofa myndi senda féluginu bréf þar sem gerð yrði nánari grein fyrir ástandi verðmerkinga.

Með bréfi Neytendastofu til félagsins, dags. 26. september 2023, greindi stofnunin féluginu frá niðurstöðum skoðananna og gerði grein fyrir þeim ákvæðum sem í gildi eru um verðmerkingar. Þá var þeim eindregnu fyrirmælum beint til félagsins að koma verðmerkingum í betra horf. Í bréfinu kom fram að könnunum stofnunarinnar yrði fylgt eftir með nýjum könnunum og mætti félagið búast við því að tekin yrði ákvörðun um sektir,



samkvæmt IX. kafla laga nr. 57/2005, yrði ekki farið að fyrirmælum stofnunarinnar um að koma verðmerkingum í rétt horf.

Þann 18. október 2023, var ástand verðmerkinga aftur skoðað í verslununum. Enn voru gerðar athugasemdir við óverðmerktar útstillingar í verslun Fjall Raven. Gerðar voru sérstakar athugasemdir við að verðmerkingar voru ekki sýnilegar á töskum og tveimur gínum. Engar athugasemdir voru gerðar í síðari skoðun Neytendastofu í versluninni Mt. Hekla.

Í skoðun Neytendastofu hjá Fjall Raven þann 18. október 2023, var þeirri athugasemd komið á framfæri að Fjall Raven væri að bíða eftir verðlistum í glugga verslunarinnar.

Með bréfi Neytendastofu til Mt. Hekla ehf., dags. 10. nóvember 2023, var félaginu tilkynnt um framangreindar athugasemdir og gefinn tveggja vikna frestur til að koma að skýringum eða athugasemendum í málinu áður en tekin yrði ákvörðun um sektir á grundvelli IX. kafla laga nr. 57/2005.

Svar barst stofnuninni með tveimur tölvupóstum, mótteknum 17. nóvember 2023, þar sem félagið sendi myndir af gínum og vöru uppstillingum í glugga verslunarinnar með verðmerkingum.

Staðfesti stofnunin móttöku og tjáði félaginu að höfð yrði hliðsjón af umræddum gögnum við töku stjórnavaldakvörðunar í málinu.

II. Niðurstaða

Í máli þessu hefur Mt. Hekla ehf. ekki sinnt fyrirmælum Neytendastofu um að koma verðmerkingum í verslun Fjall Raven á Laugavegi í viðunandi horf innan tilskilins frests.

Ákvæði 17. gr. laga nr. 57/2005, um eftirlit með viðskiptaháttum og markaðssetningu, er svohljóðandi:

„Fyrirtæki, sem selur vörur eða þjónustu til neytenda, skal merkja vöru sína og þjónustu með verði eða sýna það á svo áberandi hátt á sölustaðnum að auðvelt sé fyrir neytendur að sjá það. Neytendastofa getur sett nánari ákvæði um verðmerkingar með opinberri tilkynningu.“

Samkvæmt ákvæðinu ber söluaðilum ávallt að gefa upp verð á vörum og þjónustu. Á grundvelli heimildar ákvæðisins, sem og ákvæðis 18. gr. sömu laga, sem snýr að heimild Neytendastofu til að gefa fyrirtækjum sérstök fyrirmæli um að gera ráðstafanir til að auðvelda



viðskiptavinum að meta verð og gæði, hefur Neytendastofa sett reglur nr. 536/2011, um verðmerkingar og einingarverð við sölu á vörum.

Um verðmerkingar á vörum segir í 1. og 2. mgr. 3. gr. verðmerkingareglnanna:

„Fyrirtæki skal skýrt og greinilega merkja vörusína með réttu söluverði og einingarverði í íslenskum krónum.

Þrátt fyrir ákvæði 1. mgr. er þó heimilt að veita sömu upplýsingar nálægt vörusenda sé augljóst til hvaða vörur verðmerkingin vísar og tryggt sé að neytendur fái án vandkvæða aðgang að upplýsingum um sölu- og einingarverð sem skylt er að veita samkvæmt reglum þessum, sbr. 4. gr.“

Samkvæmt ákvæðunum ber versluninni að verðmerkja allar söluvörur sínar með réttu söluverði. Á fyrirtækjum hvílir afdráttarlaus skylda til að hafa söluvörur ávallt verðmerktar. Í máli þessu voru niðurstöður síðari skoðunar í versluninni Fjall Raven að verðmerkingum var ábótavant í verslun félagsins á Laugavegi. Eftir fyrri skoðun var féluginu gerð grein fyrir ástandi verðmerkinga í versluninni og viðeigandi reglum sem gilda um verðmerkingar og beindi Neytendastofa þeim fyrirmælum til félagsins að koma verðmerkingum í viðunandi horf. Þar sem verðmerkingum hafi ekki verið komið í viðunandi horf á þeim tíma sem leið á milli skoðana telur Neytendastofa nauðsynlegt að beita þeim úrræðum sem lög nr. 57/2005 heimila.

Ákvæði 1. mgr. 22. gr. laga nr. 57/2005 segir:

„Neytendastofa getur lagt stjórnvalssektir á fyrirtæki sem brjóta gegn:

[...]

b. stjórnvaldsreglum og ákvörðun Neytendastofu gegn viðskiptaháttum sem brjóta í bága við ákvæði II.-VIII. kafla [...]

c. reglum og fyrirmælum Neytendastofu um ráðstafanir til að auðvelda viðskiptavinum að meta verð og gæði, sbr. 18. gr.“

Með vísan til alls framangreinds, sem og að teknu tilliti til meðalhófsreglu og jafnræðisreglu stjórnsýslulaga, og með hliðsjón af sektarákvörðunum í sambærilegum málum þykir Neytendastofu hæfilegt að leggja á Mt. Hekla ehf. stjórnvaldssekt að fjárhæð 50.000 kr. (fimmtíu þúsund krónur). Sektina skal greiða í ríkissjóð eigi síðar en þremur mánuðum frá dagsetningu ákvörðunar þessarar.



III.
Ákvörðunarorð:

„Mt. Hekla ehf., Grenimeli 10, 107 Reykjavík, hefur brotið gegn ákvæði 17. gr. laga nr. 57/2005, um eftirlit með viðskiptaháttum og markaðssetningu, sem og ákvæði 3. gr. reglna nr. 536/2011, um verðmerkingar og einingarverð við sölu á vörnu, með óviðunandi verðmerkingum í verslun Fjall Raven á Laugavegi.

Með heimild í b. og c. lið 1. mgr. 22. gr. laga nr. 57/2005, um eftirlit með viðskiptaháttum og markaðssetningu, leggur Neytendastofa stjórnvaldssekt á Mt. Hekla ehf. að fjárhæð kr. 50.000 (fimmtíu þúsund krónur). Sektina skal greiða í ríkissjóð eigi síðar en þremur mánuðum frá dagsetningu ákvörðunar þessarar.“

Neytendastofa, 18. desember 2023

Þórunn Anna Árnadóttir
forstjóri

Matthildur Sveinsdóttir